

CUKICA

ZA SRETNU
ZAJEDNICU
I SRETNE
PSE U NJOJ



PRVI BH. ČASOPIS ZA VLASNIKE I LJUBITELJE PASA
januar – juni 2018. godine | broj 1 | dogstrust.ba



Anel Bećirović, šef Predstavništva
Fondacije Dogs Trust u BiH



Pozdrav ŠEFA PREDSTAVNIŠTVA

Dragi prijatelji,
predstavljamo vam prvo izdanje našeg magazina *Cukica* koji će od ove godine izlaziti dva puta godišnje.

Magazin *Cukica* namijenjen je svima koji žele zajednički doći do dana kada psi više neće živjeti nezbrinuti na ulicama nego samo sa svojim odgovornim vlasnicima.

Zato *Cukica* donosi sadržaje koji su zanimljivi i korisni za sve vas - od savjeta veterinarskih stručnjaka, iskustava i poruka sadašnjih i budućih vlasnika, ljubitelja pasa, djece, roditelja, nastavnika, predstavnika vlasti i medija.

Fondacija Dogs Trust nastavlja sa širenjem i upotpunjavanjem svoje značajne savjetodavne, tehničke i finansijske podrške sistemskom, zakonskom, efikasnom, humanom i trajnom rješavanju problema napuštenih pasa u BiH, što je od velikog značaja za dobrobit i lokalne zajednice i pasa!

Koristim ovu priliku da vas srdačno pozdravim u svoje i u ime cijelog tima Predstavništva u BiH, kao i u ime Fondacije Dogs Trust!

Saznaj, nauči, promijeni

Vaši prijatelji iz Odjela za odnose s javnošću i marketing koje ste sigurno već upoznali kroz naše zabavne kampanje za javnost, te brojne događaje i druženja, osmislili su i sa pažnjom sakupili i uredili sadržaje našeg magazina - prvjenca!



“Vizija našeg odjela je da na vama blizak, prijateljski, zabavan i jednostavan način predstavimo, informišemo i objasnimo važne informacije o zakonskom i humanom rješenju problema napuštenih pasa, na čelu sa odgovornim vlasništvom pasa kao ključem rješenja, te sve ostale aspekte problematike efikasnog i humanog upravljanja populacijom pasa, koristeći istraživanja, iskustva i ekspertizu koju je Fondacija Dogs Trust sticala tokom skoro 130 godina svog postojanja!

U proteklih šest godina radimo to na razne načine i kroz razne kanale, od informativno-zabavnih kampanja, događaja i druženja sa vlasnicima i ljubiteljima pasa, roditeljima, djecom i nastavnicima, do direktnog povezivanja sa zajednicom.

Magazin *Cukica* je još jedan način da komuniciramo sa vama, da vam ponudimo korisne i zanimljive sadržaje i odgovore pa vas pozivamo da nam svoje komentare, ideje i prijedloge šaljete na e-mail: office@dogstrust.ba sa predmetom CUKICA!

Pozivamo vas da posjetite i našu web stranicu na kojoj se nalazi elektronska verzija ovog magazina, kao i mnogo korisnih resursa, naš YouTube kanal na kojem su brojni videoklipovi koji na zabavan način govore o svemu što je važno za naše četveronožne prijatelje, te da nas pratite na našim Facebook i Instagram kanalima!

Nadamo se da ćete uživati u sadržajima magazina *Cukica* koje smo pripremili za vas!”



Sanja Bianculli, službenica za
odnose s javnošću i marketing





Upoznajte tim Predstavništva Fondacije Dogs Trust u BiH

Fondacija Dogs Trust, sa sjedištem u Velikoj Britaniji, jedna je od najvećih svjetskih organizacija za dobrobit pasa koja postoji od 1891. godine! Ova neprofitna organizacija koja se finansira isključivo od donacija koje se ne sakupljaju u BiH, ima i međunarodno iskustvo već 20 godina koje je 2016. godine objedinjeno u sestrinsku organizaciju Dogs Trust Worldwide. Angažman u BiH je započela 2012. godine s ciljem da pomogne rješenje problema napuštenih pasa kroz dosljednu provedbu progresivnog, proevropskog, humanog Zakona o zaštiti i dobrobiti životinja usvojenog 2009. godine.



Misija Fondacije Dogs Trust je:

doći do dana kada će svi psi uživati u sretnom životu, bez prijetnje od nepotrebnog uništenja.

Odgovornost prema vašem psu ključna je za njegovu sreću, ali i za dobrobit i sigurnost vas, vaše porodice i cijele zajednice. Ljudi i psi vjekovni su prijatelji, i sreća i dobrobit jednog uslovljena je srećom i dobrobiti drugog, što znači da psi mogu biti sretni samo ako su i ljudi sretni.

Zato se naš slogan "Pas je za cijeli život" u Bosni i Hercegovini reflektira u podsloganu "Za sretnu zajednicu i sretnu pse u njoj!"

Predstavništvo Fondacije Dogs Trust u BiH podržava uspostavljanje zakonskog, humanog i održivog sistema za upravljanje populacijom pasa kakav imaju sve razvijene evropske zemlje, i to kroz programe koje kreira, finansira, koordinira i nadgleda, a sprovodi u saradnji s lokalnim partnerima u Bosni i Hercegovini.

U osnovi svih naših programa je edukacija, pa se kao podrška programima na terenu značajni naponi ulažu u edukaciju javnosti i podizanje svijesti, te povezivanje sa zajednicom, posebno sa vlasnicima pasa.



Predstavništvo Fondacije Dogs Trust u Bosni i Hercegovini
+387 33 83 76 49 | office@dogstrust.ba | Gorica 61, 71000 Sarajevo





NAŠI PROGRAMI:

Program usavršavanja veterinarskih stručnjaka iz cijele BiH

- Provodi se u saradnji sa VFUNSA
- Uvršten u program cjeloživotnog učenja UNSA
- Uvršten u programe usavršavanja veterinarskih komora (FBiH i RS)
- Do kraja juna 2018. godine usavršavanje je završio ukupno 301 kandidat



Program sterilizacije pasa

(masovna sterilizacija napuštenih i besplatna sterilizacija vlasničkih pasa) na oko 40% teritorije BiH

- Program kreira, koordinira i finansira Dogs Trust a provode partnerske veterinarske klinike čiji su stručnjaci prošli Program usavršavanja na VFS-u.
- U okviru Programa sterilizacije finansiramo i vakcinu protiv bjesnila, tretman protiv crijevnih parazita i mikročip, a za napuštene pse dodatno i ušnu markicu i tetovažu radi boljeg nadzora u okviru zakonskog sistema.
- Sterilizacija je najefikasnija humana metoda za suzbijanje broja napuštenih pasa, a vlasnicima preporučujemo sterilizaciju ljubimaca jer zaustavlja reproduktivni ciklus psa, pa vlasnik ne mora brinuti o neželjenom leglu, sprečava određena neželjena ponašanja psa uzrokovana ili vezana za reproduktivne hormone, te sprečava određena oboljenja u kasnijoj dobi psa.
- Do sada je u BiH u okviru ovog programa sterilisano ukupno 50.982 pasa, od čega je preko 13.000 vlasničkih.





Program edukacije školske djece

na oko 40% teritorije BiH

- Provodi se uz odobrenja lokalnih ministarstava obrazovanja, te uz angažman partnerskih lokalnih organizacija.
- Zabavno-edukativne radionice su potpuno besplatne za škole a djecu kroz obrazovni program podučavaju o sigurnosti u kontaktu sa psima i u blizini pasa, o potrebama i odgovornom vlasništvu pasa.
- Do sada su održane 9.003 radionice kroz koje je obuhvaćeno 175.443 djece!



Program za edukaciju vlasnika pasa i obuku pasa po principu pozitivne motivacije "Škola za pse"

- Cilj programa je da obuču vlasnike pasa da svojim psima upravljaju na pozitivan način, kako bi psi usvojili najvažnije osnovne komande i imali lijepo ponašanje. Cilj ovog Programa je unaprijediti dobrobit pasa, te spriječiti napuštanje koje se vrlo često desi zbog neželjenog ponašanja psa.
- Besplatna Škola za pse radi po istim visokim standardima i procedurama kao i veliki broj Škola za pse koje Dogs Trust vodi u Velikoj Britaniji.



- Smještena je u Semizovcu (Semizovac bb, iza Energopetrol pumpe) i ima otvorene i zatvorene terene i tri stručna instruktora koja se stalno usavršavaju. Svojom lokacijom je dostupna cijeloj regiji Kantona Sarajevo, Istočnog Sarajeva i Zenice.
- Do sada je Školu za pse prošlo ukupno 424 vlasnika sa svojim psima.





Dogs Trust se od ove godine po prvi put u BiH angažira i na udomljavanju pasa kroz najnoviji Program fostering udomljavanja. Fondacija Dogs Trust je inače poznata po velikom broju izvrsnih Centara za udomljavanje pasa koje vodi u Velikoj Britaniji, te visokim standardima udomljavanja koji omogućavaju trajnu i sretnu vezu između vlasnika i psa.

Predstavljamo vam prvog čovjeka ovog programa, koordinatora Programa fostering udomljavanja, Amera Talića, naše prve fostering volontere, Hanu Mušović i Tanju Đozo, ali prije svega - zvijezdu prvog izdanja magazina Cukica – **prvog psa u Programu fostering udomljavanja, psa po imenu Teo!**



Još u djetinjstvu sam skupljala i hranila sve životinje koje sam mogla naći na ulici.

U ratu sam i zaradila "kaznu" jer sam jedinu konzervu dala štencima koje smo pazili u naselju.

Oduvijek mi je želja bila da radim sa životinjama i pomažem im, a to se sada i ostvarilo.

Kroz volonterski program Dogs Trusta našla sam idealan način da dam svoj doprinos društvu i pomognem našim čupavim prijateljima.

Tanja Đozo



Ovo je Teo, pas koji želi usrećiti svog novog vlasnika i njegovu porodicu. Teo je sretan, radostan, susretljiv i otvoren pas koji voli ljude i vjeruje im.

S obzirom na to da nije navikao na igračke, nije im neki ljubitelj, ali pored ljudi kojima rado priđe da se mazi, Teo voli i druge pse i lijepo se igra s njima.

Vrlo je inteligentan i komandu Sjedi naučio je za cijele tri minute! Iako je pronađen na ulici, Teo je pokazao iznimnu toleranciju pri veterinarskom pregledu, kupanju i češljanju, u čemu će sigurno svakim danom sve više uživati.

Njegov apetit je zdrav, što je jako dobro s obzirom na to da na ulici nije imao dovoljno hranjivu ishranu, pa iz dana u dan, od mršavka, postaje lijep i zdrav pas!

Teo je idealan pas za odgovorne vlasnike koji žele umjerno aktivnog psa koji će u njihov život svakodnevno unositi radost i uzvraćati im zahvalnošću i bezuvjetnom ljubavlju!





AMER TALIĆ, fostering koordinator

KVALITETNO UDOMLJAVANJE

Šta je to Fostering udomljavanje?

Fostering udomljavanje je udomljavanje pasa uz pomoć fostering volontera/fostera koji bi zapravo bili privremeni vlasnici psa dok mu naš tim traži trajni dom. U nedostatku Centra za udomljavanje gdje bi psi bili smješteni, fosteri igraju jako važnu ulogu. Oni su prvi susret psa sa vlasnikom koji će pomoći u pripremi psa koji uđe u program za trajno udomljavanje za njegov trajni dom. Tako će ne samo spasiti život jednom psu i omogućiti budućem vlasniku da ima sjajnog ljubimca već će pomoći zajednici u rješavanju problema napuštenih pasa.

Koji psi ulaze u ovaj Program?

Program fostering udomljavanja uključuje napuštene pse sa ulice koji su procijenjeni kao visoko prilagodljivi za život sa vlasnikom. Psi su identificirani uglavnom kroz kampanje masovne sterilizacije koje finansira Dogs Trust, a procjenu vrši stručni tim Dogs Trust Škole za pse. U Program mogu biti uključeni i psi o kojima vlasnik više ne može brinuti, ako stručnjaci procijene da će se lako moći prilagoditi na novi dom. Ovakva metoda omogućava da što veći broj socijaliziranih i zdravih pasa sa ulice pronađe sretni i trajni dom.

Kako izgleda put od uličnog psa do psa sa trajnim domom u ovom Programu?

Nakon procjene, pas je veterinarski obrađen (sterilizacija, vakcinacija, ostali neophodni tretmani i liječenje), okupan i očištan, tako da u svoj privremeni dom – kod fostera ide potpuno zdrav, čist i zaštićen. Foster je identificiran tako da su njegove/njene mogućnosti usklađene s potrebama foster psa. Dogs Trust za boravak psa u privremenom domu dobija sve što mu je potrebno (hrana, ogrlica, povodac, zdjelice, vrećice za pseći otpad, podloga/krevet, i ostalo što je dostupno), osim brige, pažnje i ljubavi, što je i uloga fostera koji za ovog psa nema nikakav finansijski trošak. Kada je pronađen i utvrđen pravi spoj, pas iz privremenog doma ide u trajni! Novi vlasnik dobija starter poklon paket sa potrepštinama za psa, a u prvo vrijeme, dok se pas ne adaptira, dostupna je i savjetodavna podrška fostering koordinatora i Škole za pse.

Šta je suština Dogs Trust standarda za udomljavanje pasa?

Suština Dogs Trust standarda udomljavanja pasa zasniva se na cilju da se psu osigura sretan i trajan dom. To znači pronaći idealan spoj između potreba i karaktera psa i mogućnosti i karaktera vlasnika i njegove porodice. Na primjer, ako ste neko ko ima aktivan život i često ste u prirodi gdje možete povesti psa, onda vaš pas treba da voli mnogo kretanja. Ovakav način udomljavanja je kvalitetno udomljavanje jer osigurava da su svi zadovoljni i da neće biti novog napuštanja. Ako se vlasnik i pas slažu, onda su i oni sretni, i njihova okolina, ali i cijela zajednica!



U kojoj regiji se provodi ovaj Program?

Program fostering udomljavanja se za početak provodi samo na području Kantona Sarajevo, jer su trenutno dostupni resursi dovoljni za samo jednog fostering koordinatora i jednu lokaciju Škole za pse, a oboje su neophodni za ovaj način udomljavanja.

Šta savjetujete budućim vlasnicima pasa koji razmatraju udomljavanje? Kada nabavljate psa, potrebno je samom sebi odgovoriti na mnogo pitanja, a prije svega zašto želim psa, šta od njega očekujem?

Ključno i eliminiirajuće pitanje je: jesam li spreman/spremna da se o tom biću brinem do kraja njegovog života? Nastavite sa procesom samo ako je vaš odgovor vrlo čvrsto DA! Nakon ova dva osnovna pitanja, sljedeće je – kakvog psa želim? Mnogi će reći – želim određenu rasu, ili boju, ili veličinu, ili karakternu osobinu. Karakter svakako igra ulogu, jer prema njemu biramo i ljudske prijatelje, pa je od svega navedenog ovo važno.

Ali da biste i vi kao vlasnik i vaš pas bili zadovoljni i da biste uživali u ovom iskustvu, najvažnije pitanje je: kakve su potrebe psa koji će biti moj ljubimac, i da li im ja mogu udovoljiti?

Upravo u tome vam mi možemo pomoći! Ako želite udomiti pravog psa za vas, popunite prijavu u ovom časopisu i pošaljite je na adresu: Fondacija Dogs Trust, Predstavništvo u BiH, Gorica 61, 71000 Sarajevo, ili prijavu pronađite na našoj web stranici i pošaljite je na e-mail: fostering@dogstrust.ba.





Sistemski pristup rješenju problema napuštenih pasa

JESTE LI SE IKADA ZAPITALI: ODAKLE PSI NA ULICI?!

Postoje oni koji misle da su psi na ulici oduvijek, da su jednostavno tu... Ali hajde da razmislimo! Sasvim sigurno psi nisu došli sa druge planete, a nisu ni iz neke divljine.

Nekada davno prvi vlasnik odlučio je da više ne želi da se brine o svom vjernom prijatelju. Tužan i sam, pas je lutao, tražio hranu, bježao od vremenskih nepogoda, sakrivao se od ljudi koji su mu htjeli nauditi. Tu je upoznao još jednog psa sličnog njemu. I tako počinje priča "pasa lotalica", ali nažalost tu se i ne završava.

u kasnijoj dobi već i određena neželjena ponašanja psa, te mogućnost od neželjenih legala o kojima se vlasnik ne može brinuti.

Za one koji su spremni da dobiju dom, dio sistema je i udomljavanje koje se može provoditi kroz tranzicijska skloništa uspostavljena od strane lokalnih vlasti i koji su važan dio sistema, te kroz angažman lokalnih i međunarodnih nevladinih organizacija.

Ipak, postoji dio pasa koji su i miroljubivi i zdravi, a i sterilisani, a koji ne mogu naći trajni dom. Umjesto smještanja svih ovih pasa u masovna

da mu osigurate zdravu hranu, frišku vodu, prozračno, suho i čisto mjesto za boravak, dovoljno šetnje i veterinarsku njegu, što će mu biti potrebno do kraja života, jako je važno da dobijete dobar savjet o egzaktnim potrebama i karakteru psa kojeg namjeravate odvesti kući. Tako ćete izbjeći nepotrebnu frustraciju i spriječiti stres psu koji se možda ne uklapa u vaše mogućnosti. Razmislite i o udomljavanju uz podršku našeg Programa fostering udomljavanja gdje ćete dobiti punu podršku da pronađete psa koji je idealan za vas, vaše ukućane, životni stil i karakter! Pri tome nećete imati početne troškove jer će pas dobiti sve neophodne vakcine, sterilizaciju i obuku – potpuno besplatno! Spasite jedan život, pomozite zajednici i usrećite se sa psom koji kao da je čekao baš na vas!

Takvog psa nećete poželjeti napustiti već ćete i vi i pas uživati u čvrstoj vezi koju ćete izgraditi uzajamnim poštovanjem.

AKTERI U EFIKASNOM, ZAKONSKOM I HUMANOM RJEŠENJU

Problem napuštenih pasa, popularno nazvanih psima "lotalicama", po nekim je izvještajima u Kantonu Sarajevo nešto neprimjetniji nego ranije. Jedan dio zasluge definitivno pripada kampanjama masovne sterilizacije, ali jedan dio je rezultat aktivnosti lokalnih vlasti i aktivista. Međutim, treba biti svjestan da problem nije riješen i ne može biti bez adekvatnog, zakonskog sistema za upravljanje populacijom pasa kakav imaju svi razvijeni centri koji nemaju ovaj problem. Ako želimo trajno, efikasno, zakonsko i humano rješenje, inicijativa lokalnih vlasti je prijeko neophodna. Mada Dogs Trust ima programe posebno kreirane da podupru ovaj sistem, samo lokalne vlasti mogu, a i obavezne su, uspostaviti sistem i pobrinuti se da se on dosljedno provodi. Građani koji imaju svoje predstavnike u vlasti



Da li ste znali da samo od jedne ženke na svijet u godini dana može doći i do 18 novih psića, a da su ti psići reproduktivno zreli od svog šestog mjeseca. Napuštanje pasa i nedostatak sankcija za kažnjavanje, tj. neodgovorno vlasništvo i nedostatak sistema, glavni su razlozi za postojanje problema napuštenih pasa.

I u tome leži i ključ rješenja!

Ako nema više napuštanja, bar ne kažnjelog, i ako postoji sistem koji provodi mjere odgovornog vlasništva, u korijenu je riješen najvažniji problem. A šta sa onima koji su već na ulici, pitat ćete? Elementi sistema su tu da riješe i to. Tako je masovna sterilizacija najefikasnija humana metoda za suzbijanje broja napuštenih pasa, a sterilizacija vlasničkih pasa ne samo da sprečava neželjena oboljenja psa

skloništa koja brzo postanu neuvjetna i napunjena, a i finansijska rupa bez dna, jedino privremeno rješenje je da jedan dio takvih pasa ostane na svojim staništima, pod nadzorom koji se može provoditi u saradnji sa građanima hraniteljima i lokalnim nevladinim organizacijama.

Često se spominje da su napušteni psi u blizini škola i bolnica, kao da su sami to izabrali. Istina je, oni su tu jer je tu izvor hrane! Zaštita otpada također je važna mjera sistema, posebno u prelaznom periodu kada psi još žive na ulicama. Alternativna hranilišta na lokacijama udaljenim od ovakvih mjesta, te adekvatna zaštita otpada, pomoći će zajednici u prelaznom periodu.

Broj vlasnika pasa u BiH raste, ali važno je da to bude odgovorna odluka. Ako želite nabaviti psa, pored mogućnosti





također imaju mogućnost da od njih zahtijevaju ovakvo rješenje. Svako kršenje zakona, svaka kratica, naizgled i trenutno maskira problem, ali rješenje kako svi želimo se time samo prolongira. Pored programa koje kreira, koordinira i finansira kako bi što je više moguće, u okviru svog statusa strane dobrotorne organizacije, visoke ekspertize u ovom polju te dostupnih resursa, pomogli trajnom rješenju, Predstavništvo je na brojne načine i u više navrata objašnjavalo elemente i način funkcioniranja ovakvog sistema, pozivajući odgovorne da povećaju inicijativu

u aktivnostima koje samo oni mogu provesti, te da time omoguće da naša podrška bude maksimalno iskorištena. Korištenjem naše podrške, lokalne vlasti mogu ubrzati proces rješavanja problema na trajan način, te uštedjeti sredstva iz budžeta koja onda mogu realocirati u brojne, prijeko neophodne socijalne programe.

Zakon o zaštiti i dobrobiti životinja u BiH daje sve potrebne okvire za uspostavu i funkcioniranje ovakvog sistema, jedinog koji bi osigurao da se problem riješi trajno i da se više ne ponovi.



Sistem efikasnog, zakonskog i humanog upravljanja populacijom pasa

IZVORI

Psi u zajednici

Neodgovorno vlasništvo

Prirodna reprodukcija

PRIVREMENE MJERE

Šta treba uraditi odmah kako bi počeli stavljati problem pod kontrolu i spriječili dalju eskalaciju?

Masovna sterilizacija napuštenih pasa

Nadgledanje zdravih, socijaliziranih i sterilisanih pasa koji privremeno ostaju na svojim staništima

- Udomljavanje
- Hitno upravljanje otpadom
- Alternativna mjesta hranjenja

TRAJNE MJERE

Šta treba nastaviti redovno raditi kako se problem ne bi vratio i ponovio?

Sankcionisanje neodgovornog vlasništva i drugih oblika kršenja zakona

→ Registar pasa/mikročipovanje/procedure za efikasno sankcionisanje

Edukacija javnosti, školske djece, podizanje svijesti o sistemu i odgovornom vlasništvu pasa, o važnosti obuke pasa po principu pozitivne motivacije

Tranziciono sklonište

- Higijenski servis
- Udomljavanje
- Procesiranje bolesnih i agresivnih pasa

Upravljanje otpadom

REZULTATI

- ✓ Nema novih legala
- ✓ Nema zdravstvenog i sigurnosnog rizika za zajednicu
- ✓ Nema pasa oko škola, bolnica i vrtića
- ✓ Udomljen dio zdravih socijaliziranih pasa

- ✓ Nema nekažnjeno napuštanja ili neadekvatnog upravljanja psima u vlasništvu
- ✓ Nema prenatalnih, neuvjetnih i skupih masovnih skloništa
- ✓ Podizanje svijesti o odgovornom vlasništvu, udomljavanju i sigurnosti sa psima





Sterilizacija/kastracija pasa dio je odgovornog vlasništva

O tome zašto je sterilizacija/kastracija pasa važna za zdravlje psa ali i za dobrobit zajednice razgovarali smo sa Nejom Mašnić, DVM i veterinarskom koordinatoricom Predstavništva

Šta je sterilizacija/kastracija pasa?

Sterilizacija/kastracija psa rutinski je operativni zahvat koji predstavlja najefikasniju humanu metodu upravljanja populacijom pasa, jer sprečava nova legla pasa na ulicama kao i rađanje neželjenih kućica o kojim se vlasnici najčešće ne mogu brinuti, te koji onda završe napušteni na ulici.

Zašto je sterilizacija/kastracija psa važna?

Sterilizacija/kastracija psa sa sobom povlači brojne prednosti, kako za psa, tako i za vlasnika, ali i za zajednicu.

Kako sterilizacija utječe na ponašanje psa?

Sterilizacija pasa potiče mirnije, predvidljivije ponašanje pasa, čineći ga mnogo pogodnijim za ljubimca. Također, eliminira neželjeno seksualno ponašanje, te može spriječiti agresivno, borbeno i destruktivno ponašanje. Sterilisani/kastrirani psi nisu skloni

lutanju i označavanju svog teritorija. Ženke su dva puta godišnje po tri sedmice u sezoni parenja. U tom periodu ženka psa može se čudno ponašati želeći da pobjegne u potrazi za partnerom. Mužjaci se također mogu čudno ponašati u periodu kada je lokalna ženka u sezoni parenja. To ponašanje očituje se mogućim bježanjem, trčanjem – čak i prometnim ulicama, ili skakanjem s visine, balkona ili prozora.

A šta je sa zdravljem sterilisanog psa?

Skotnost psa može prouzročiti ozbiljne zdravstvene probleme kao što su upala maternice i mliječnih žlijezda. Sterilizacija/kastracija psa u ranijem dobu smanjuje rizik nastanka pojedinih vrsta oboljenja i kod ženki i kod mužjaka.

Koje još prednosti sterilizacije ljubimaca možete navesti vlasnicima pasa?



Sterilizacijom/kastracijom psa izbjeci ćete troškove neplaniranog okota i brige o kućicama. Prevenirat ćete nezgodne situacije uzrokovane neobuzdanim ponašanjem psa koji je pod utjecajem reproduktivnih hormona, a mogu se izbjeći i visoki računi veterinarskih usluga.

Budite odgovoran vlasnik psa, sterilizirajte/kastrirajte svog psa jer je to najbolje za njega, za vas, i za cijelu zajednicu!

Sterilizaciju/kastraciju za vašeg krznenog prijatelja finansira Fondacija Dogs Trust, a proceduru zakažite direktno sa partnerskom veterinarskom klinikom čije kontakt telefone možete pronaći na www.dogstrust.ba.

Samo uz sterilizaciju/kastraciju besplatni paket za vašeg psa uključuje i:

- Vakcinu protiv bjesnila – ako vaš pas već nije vakcinisan za tekuću godinu. Vakcinisanje ljubimaca protiv bjesnila na godišnjoj osnovi je zakonska obaveza svakog vlasnika/vlasnice jer štiti i pse i zajednicu od ove opasne bolesti;
- Tretman protiv crijevnih parazita koji sprečava širenje zoonoza (bolesti koje se mogu prenijeti s psa na čovjeka);
- Mikročip, ako ga Vaš pas već nema. Označavanje ljubimaca je zakonska obaveza svakog vlasnika/vlasnice, a jako je važna za provođenje mjera odgovornog vlasništva te trajno rješavanje problema pasa lualica, jer je neodgovorno vlasništvo pasa zapravo korijen problema napuštenih pasa.





MOŽDA VAŠ PAS NE RAZUMIJE
ALI ĐURO I VI ZNATE!

BESPLATNA STERILIZACIJA VLASNIČKIH
PASA ŠIROM BOSNE I HERCEGOVINE

www.dogstrust.ba

Kako prevazići strah od psa i smanjiti sigurnosni rizik u kontaktu sa psom ili u blizini pasa

Praktični savjeti za cijelu porodicu

Milioni ljudi širom svijeta imaju pse kao kućne ljubimce. U Bosni i Hercegovini ovaj broj je vidno veći u posljednjih desetak godina. Samo u Kantonu Sarajevo je broj vlasničkih pasa koji vidljivo konstantno raste prema istraživanju Fondacije Dogs Trust u junu 2017. godine iznosio oko 9.000! Pored toga, zbog nedosljednog provođenja državnog Zakona o zaštiti i dobrobiti životinja, te nepostojanja efikasnog i humanog sistema za upravljanje populacijom pasa za koji Zakon daje čvrste okvire, na ulicama nažalost još uvijek žive napušteni psi i njihovi potomci.

Kao razumna bića koja mogu upravljati svojim postupcima veoma je važno naučiti što više o "čovjekovom najboljem prijatelju" i o najvažnijim principima sigurnosti u blizini pasa i u kontaktu sa psom.

A za ovu temu, najvažnija su djeca kao najranjivija kategorija društva.

Zato Fondacija Dogs Trust u osnovnim školama provodi svoje edukativno-zabavne radionice koje podučavaju djecu o sigurnosti sa psima, te o potrebama i važnosti odgovornog vlasništva pasa. Na radionicama djeca nauče šta se preporučuje u određenim potencijalno opasnim situacijama sa psima, ali i kada je i kako sigurno prići psu.

Strah od pasa

Mi u Fondaciji Dogs Trust razumijemo da se ne osjećaju svi ugodno u blizini pasa i znamo da ih se neki ljudi plaše. Strah može utjecati na kvalitet života vašeg djeteta, počevši od toga da dijete odbija igru u parku ili da ne želi da posjeti prijatelje koji imaju psa, do toga da se mogu uplašiti i kada u šetnji vide psa, čak i u daljini.

U ovom članku odlučili smo ponuditi pomoć i savjete o tome kako da svom djetetu pomognete da se oslobodi



straha od pasa. Zapamtite, ekscitivan strah može blokirati racionalno ponašanje i reakciju, te dodatno povećati sigurnosni rizik!

Odredite razloge za strah od pasa!

Postoji pet najčešćih razloga za strah od pasa:

- loše iskustvo sa psom;
- naučen stav i ponašanje od roditelja, članova porodice ili prijatelja;
- ponašanje razigranog psa, npr. lajanje, skakanje i trčanje;
- razlike u kulturama;
- utjecaj medija.

Odredite nivo straha!

VISOK NIVO STRAHA:

Strah utječe na svakodnevno funkcionisanje i život.

I sama slika psa dovodi do neposredne anksiozne reakcije.

Pogled na psa dovodi do neposredne anksiozne reakcije.

SREDNJI NIVO STRAHA:

Boravak u istoj prostoriji sa psom dovodi do straha i anksiozne reakcije.

Strah postoji isključivo od velikih pasa.

NIZAK NIVO STRAHA:

U blizini pasa se javlja nelagoda, ali je sasvim uredu ako su oni na sigurnoj udaljenosti.

Poduzmite adekvatnu akciju prema principima sigurnosti u blizini pasa.

Važno: Ako imate srednji ili visok nivo straha, važno je da se obratite za stručnu pomoć.

Praktični savjeti i tehnike podrške

Evo kako možemo započeti proces upravljanja strahom:

Prepoznajte kako se vaše dijete osjeća kroz govor tijela, imenujte njihova osjećanja i navedite šta je dovelo do njih. "Pitam se da li se osjećaš zabrinuto jer u blizini čuješ lavež psa?" *Ovo će dovesti do toga da se dijete osjeća shvaćeno.*

Dozvolite im da dožive svoje iskustvo i osjećanja. "Uredu je, razumijem da se osjećaš zabrinuto zbog psa." *Ovo šalje poruku da su osjećanja korisna i dobra, te se djeca osjećaju prihvaćeno.*

Skrenite im pažnju na trenutak u kojem se nalazite i pomozite im da procijene stvarnu situaciju u smislu sigurnosti. "Taj pas je na povocu kojeg drži njegov vlasnik." *Ovim ćete im pomoći da shvate da nema neposredne opasnosti.*

Pomozite im da prepoznaju kada im njihovo tijelo šalje signale o tome kako se osjećaju, npr. šta znače "leptirići" u stomaku. Motivirajte ih da razmisle o tome šta mogu učiniti da se osjećaju bolje, npr. vježbe disanja.





Pomozite im da "uhvate" svoje misli ili pokušajte identificirati njihove misli umjesto njih. "Pitam se da li razmišljaš o mogućnosti da će pas skočiti na tebe?" ili "Koje ti misli prolaze kroz glavu vezano za ovog psa?/ Šta misliš da će pas uraditi?"

Ako identificirate da vaše dijete ima negativne misli, pokažite im **kako da ih pretvore u pozitivne**. Npr. "Taj pas će me ujesti" može postati "Taj pas je na povocu sa svojim vlasnikom/ ne skače, a svakako znam da ne ujeda svaki pas".

Ohrabrite ih da postanu "detektivi" vlastitih misli, te da svoje

destruktivne misli preispituju tako što ćete postaviti sljedeća pitanja: Da li je to zaista istina? Da li će se to zaista desiti? Postoje li neke situacije u kojim neko prođe pored psa koji ne skače/ne ujeda?

Ohrabrite pozitivne misli i modelirajte pozitivno ponašanje u blizini pasa kako biste im pomogli promijeniti negativnu percepciju i reakciju na psa u mnogo racionalniju, i sigurniju.



Isplanirajte korake za siguran prilazak i interakciju sa psima kako biste promijenili djetetovu percepciju o psima:

- Pričajte pozitivno o psima.
- Čitajte knjige u kojim se nalaze slike pasa.
- Gledajte filmove u kojim je glavni glumac pas.

Igrajte se "uloga": koristite figure/igračke kako biste glumili situacije koje plaše vaše dijete, i vježbajte šta mogu uraditi kako bi se lakše nosili s njima.

Radite na tome da dijete može prići psu

kada je sa svojom odraslom osobom i kada je pas

na povocu vlasnika, te naravno

po principima sigurnog

p r i s t u -

pa (pitaj roditelja,

pitaj vlasnika, do-

pusti psu da ti onjuši

ruku, nježno ga pomiluj po

krznu ispod vrata ili niz leđa, ali NE

PO GLAVI!)

Provodite vrijeme sa psima

koji su mirni i tihi i vježbajte principe sigurnog pristupa psu.

Posjetite www.dogstrust.ba gdje možete pronaći kratki film o Programu edukacije školske djece, brošure sa korisnim informacijama i kontakte za zakazivanje besplatnih radionica za djecu!

Najvažniji savjeti za roditelje

Pas mora biti na povocu sa vlasnikom. **O**državajte sigurnu udaljenost od psa do odobrenja vlasnika za prilazak.

Bez panike! Preuzmite ulogu naratora situacije kako biste umanjili paniku: "Pas laje i čini te nervoznim."

Ine osuđujte - već prihvatite djetetov strah i govorite pozitivno.

Jer ako prepoznate negativne misli, možete dijete naučiti da ih zamijeni sa pozitivnim.

Evo prilike da se igrate detektiva: Ohrabrite dijete da istražuje misli koristeći pitanja: "Koje su šanse da će se to stvarno desiti?" "Koje je tvoje dosadašnje iskustvo s tim?" "Jesi li 100% siguran?"

Disanje pomaže! Vježbe disanja mogu se raditi kod kuće kako bi pomogle pri smirivanju djeteta: udisaj treba da traje 5 sekundi, a izdisaj 7 sekundi.

Ima li napretka? Procijenite nivo straha, i pišite dnevnik kako biste pratili da li se taj strah smanjuje.

S igračkama je zabavnije! Glumite i igrajte se s igračkama, pri tome razgovarajući o ponašanju pasa.

TV i filmovi mogu pomoći! Gledajte filmove u kojima su glavne uloge psi!

Rješenje tražite i u knjigama! Čitajte knjige sa pričama o psima i slikama pasa!

Akada budete spremni, dogovorite upoznavanje sa tihim i mirnim psom!

Hvalite dijete svaki put za pozitivne misli i odgovoran pristup psu!





Draga djeco,



...neki od vas sigurno imaju pse kao ljubimce, ili bar imate prijatelje koji su vlasnici pasa, ali i sami znate da je na ulicama naših gradova nažalost još uvijek veliki broj napuštenih pasa. Kako biste uvijek bili što sigurniji, jako je važno da se uvijek prisjetite i koristite principe sigurnosti u kontaktu sa psom ili u blizini pasa koje ste naučili na Dogs Trust radionicama u školi!





PRINCIPI SIGURNOSTI u kontaktu sa psom i u blizini pasa



1 Nikada ne prilazi nepoznatom psu, ma koliko sretan i prijateljski raspoložen izgledao



2 bla, bla, bla...
Upoznaj potrebe i prirodu psa da bi bio sigurniji



3 Ako pas skoči, stani i preklopi ruke



4 Nikada ne prilazi psu koji jede ili spava




5 Nikada ne proizvodi glasne zvukove i ne viči u blizini psa



6

Nikada ne trči ako je nepoznat pas u tvojoj blizini



7

Nikada ne vuci psa za rep ili uši



8

Nikada se ne igraj sa psom, pa čak ni sa svojim, bez odobrenja i nadzora odrasle osobe koja dobro poznaje psa!



9

Nikada ne prilazi vlasničkom psu bez odobrenja i prisustva i svog roditelja i vlasnika psa



10

NIKADA, ALI BAŠ NIKADA, NE PRILAZI NEPOZNATOM PSU





Dječiji kutak

WORDSEARCH

S O K N C Y X U K C R Y U X T
 N A G R A D A W O I O X V S O
 V V K V E I I X Z H T V N T G
 A O T X K V Y Q Q P P A S E R
 N V O D A K E H N X R W S R L
 G K V U P A A T L V S G P I I
 M P X L J O I S A V N X K L C
 O Z Y O A Z V W T V I W S I A
 Y U C E P S T O V R K N O Z E
 M H R A N A N L D U A G L A N
 B X V E T E R I N A R C O C V
 J W K Q N D S X K I C X I I E
 Y W D Z D J E L A U Y B Q J G
 Q V A R L B G S O B U K A A A
 L K H B X W J N F C X U H Q Y

Pronađi sljedeće riječi:


- POVODAC
- OGRLICA
- ZDJELA
- VETERINAR
- OBUKA
- PAS
- VLASNIK
- KREKET
- VODA
- HRANA
- NAGRADA
- PRŠNIK
- STERILIZACIJA



KRIŽALJKA

VODORAVNO

1. navikavanje ili prilagođavanje psa na okolinu
2. "čovjekov najbolji prijatelj"
3. mladunče psa
4. zakonski obavezna oznaka za psa
5. doktor koji liječi životinje



OKOMITO


1. zaštita protiv zaraznih bolesti
2. nikada ne _____ nepoznatom psu bez vlasnika
3. uže na kojem se vodi ljubimac
4. pružiti psu dom
5. Dogs Trust slogan za djecu, "Budi _____, budi odgovoran."
6. željeno ponašanje psa treba _____
7. posuda iz koje psi jedu/piju

RJEŠENJA: Vodoravno: 1. socijalizacija 2. pas 3. štene 4. mikročip 5. veterinar Okomito: 1. vakcinacija 2. prilaži 3. povodac 4. udomiti 5. siguran 6. nagraditi 7. zdjela






BOJANKA



LABIRINT



Pomozi psiću da nađe put kroz labirint do hrane!



DogsTrust





NOVOSTI

u 2018. godini


Program usavršavanja veterinarskih stručnjaka uvršten je u Program cjeloživotnog učenja na Univerzitetu u Sarajevu i Plan usavršavanja članova veterinarskih komora.

Veterinarska komora Republike Srpske je na 23. savjetovanju doktora veterinarske medicine RS dodijelila počasne licence šefu Predstavništva Fondacije Dogs Trust u BiH Anelu Bećiroviću i službeniku za kampanje i trening Dini Kurbegoviću. Od ove godine Program masovne sterilizacije napuštenih pasa provodi se i u Banjaluci kao i u 7 okolnih općina (općine Kozarska Dubica, Prijedor, Gradiška, Kozarac, Omarska, Laktaši i Prnjavor), te u svim općinama Istočnog Sarajeva, dok će u drugom dijelu 2018. godine vlasnici pasa u ovim regijama moći iskoristiti i naš Program besplatne sterilizacije / kastracije za svog krznenog ljubimca!

Od ove godine, u široj regiji Banjaluke, uključujući 7 okolnih općina, te u svim općinama Istočnog Sarajeva, uz odobrenje Ministarstva prosvjete i kulture Republike Srpske provodi se i Program edukacije školske djece.

U sklopu Programa edukacije školske djece u Sarajevsko-zvorničkoj regiji kao i Banjaluci održana su takmičenja za osnovce u sklopu kojih je 6 osnovnih škola osvojilo vrijedne nagrade koje uključuju i opremu za unapređenje nastavnog procesa.

Zvanično pokretanje Programa fostering udomljavanja, kao prvi korak ka dugoročnom cilju izgradnje i otvaranja prvog Dogs Trust Centra za udomljavanje u Bosni i Hercegovini.



Predstavništvo Fondacije Dogs Trust u BiH od 2018. godine možete pratiti i na Instagramu @dogstrustbih





2018. u brojevima

Polugodišnja postignuća
Predstavništva fondacije
Dogs Trust u BiH



STERILIZACIJE/KASTRACIJE PASA



7.484 →
sterilisanih/kastriranih pasa u
prvih **6 mjeseci 2018.** godine

preko
1.200
vlasničkih pasa

EDUKACIJA ŠKOLSKE DJECE



32.491
dijeca pohađalo **1.912** radionica

PROFESIONALNO USAVRŠAVANJE VETERINARA I VETERINARSKIH TEHNIČARA



36
kandidata završilo Program
stručnog usavršavanja uz
mentorstvo od **6** međunarodnih
veterinarskih volontera koji su
posjetili Bosnu i Hercegovinu

ŠKOLA ZA PSE



81
vlasnika sa psom završio
besplatnu edukaciju za
vlasnike i obuku za pse

PROGRAM FOSTERING UDOMLJAVANJA



3 fostering
volontera

1

napušteni pas postali su dio
Programa fostering udomljavanja

EDUKACIJA I PODIZANJE SVIJEŠTI JAVNOSTI

9 objavljenih
saopštenja
za javnost

4 kampanje
2 događaja proglašenja
pobjednika dječijih
takmičenja

događaj fotografisanja odgovornih
vlasnika sa svojim psima
Nagradno fototakmičenje za vlasnike
pasa: "Kako moj pas i ja ličimo"





Besplatna edukacija vlasnika i obuka pasa

ŠKOLA ZA PSE

Mnogi od vas su već čuli za Školu za pse – Program edukacije vlasnika i obuke pasa po principu pozitivne motivacije. Škola za pse u BiH, smještena u Semizovcu, radi po istim pravilima, principima i standardima kao i veliki broj Škola za pse koje Dogs Trust vodi u Velikoj Britaniji. Važna razlika između Škole za pse i mnogih drugih mjesta za obuku pasa je da se u Školi za pse vlasnici obučavaju da rade sa svojim psima i nauče ih osnovnim komandama, po uputama i pod nadzorom stručnih instruktora. Ovo je ključno za razvijanje jake veze između vlasnika i psa, i otvara mogućnost da vlasnik kontinuirano radi sa svojim psom, pomažući mu da dobije potrebnu mentalnu stimulaciju i nakon završetka obuke u Školi.

Često čujemo da vlasnici pasa skupo plate obuku psa, samo da bi ubrzo po povratku pas nastavio sa prijašnjim ponašanjem zbog kojeg ga je vlasnik i poslao na obuku. Razlozi za ovo su višestruki, a najvažniji je taj što je pas naučio da sluša instruktora/trenera koji zna šta da radi da bi ga pas slušao,

ali i zato što vlasnik nastavlja sa "greškama" koje je pravio u odnosu sa psom prije obuke. Nadalje, ako je pas obučen po principu kažnjavanja, razlog za njegovo "lijepo ponašanje" bit će asocirano sa kaznom, a ne nagradom, i pas će slušati iz straha. Ovo svakako ne doprinosi dobroj vezi sa vlasnikom ali nosi i rizik od akumulirane frustracije i nagle promjene u ponašanju psa koja može biti rizična za okolinu. Svoje prijatelje ničemu ne biste podučavali vikanjem i kažnjavanjem; nemojte to raditi ni sa svojim četveronožnim najboljim prijateljima!

Usto, Škola za pse je potpuno besplatna za vlasnike, ali se od njih zahtijeva odgovoran odnos prema obuci, redovan dolazak na zakazane termine i obavezan rad kod kuće tokom obuke, po uputama instruktora!

Prijavite se već danas! Obrazac je na kraju ovog časopisa, a možete ga poslati poštom na našu adresu, ili elektronski putem naše web stranice www.dogstrust.ba!


**EDUCIRAN VLASNIK
 ŠKOLOVAN PAS!**

**BESPLATNA ŠKOLA ZA PSE
 DA VAŠ PAS SLUŠA SA ZADOVOLJSTVOM, PRIJAVE NA
www.dogstrust.ba**





OSNOVNE KOMANDE u slikama uz upute

Iako mnogi misle da se obučavanje pasa sastoji od vježbanja trikova, ono što je najvažnije za čvrst i dobar odnos između psa i vlasnika, te za sigurnost i psa i njegove okoline, jeste obuka u osnovnim komandama. Ovdje vam predstavljamo tri osnovne komande sa fotografijama i uputama, a mnogo

više o važnosti obuke pasa po principu pozitivne motivacije naučite kroz naš YouTube serijal "Obuka bez muke za Dogs Trust Cuke", nakon čega ćete biti potpuno spremni da se prijavite za besplatnu Školu za pse! Prijave na: www.dogstrust.ba

Komanda "sjedi"

- ✿ Pas treba da je ispred vas.
- ✿ Nagrada treba biti u ruci, tako da je pas svjestan toga.
- ✿ Podignite ruku s nagradom iznad glave psa (ovo će prirodno psa nagnati da sjedne).
- ✿ Istovremeno, i verbalno izdajte komandu: "SJEDI".
- ✿ Čim pas sjedne, dajte mu nagradu!
- ✿ Ne dajte nagradu ako pas ne sjedne, već pokušajte ponovo!



1



2



3



1



2



3



4

Komanda "leži"

Ova komanda radi se iz komande "sjedi".

- ✿ Pas sjedi ispred vas.
- ✿ Nagrada je u zatvorenoj šaci, i pas to zna.
- ✿ Šaku s nagradom spustite na pod ispred glave psa, navodeći ga tako da legne.
- ✿ U momentu dok ovo radite, izdajte i verbalnu komandu: "LEŽI".
- ✿ Kada pas legne, ODMAH ga nagradite!
- ✿ Ne dajte nagradu ako pas ne legne, već pokušajte ponovo!

Zapamtite: Nikada ne kažnjavajte psa! Izostanak nagrade kada ne prati komandu, i nagrada odmah nakon dobro urađene komande, dovoljna je poruka psu. Svako nagrađeno ponašanje psa će se sigurno nastaviti! *Kako bi vaš pas slušao sa zadovoljstvom, prijavite se za besplatnu edukaciju vlasnika i obuku pasa u Dogs Trust Školi za pse.*



1



2



3



4

Komanda "pored"

- ✿ Pas je ispred vas (sjedni ili stoji).
- ✿ Nagrada je u ruci i pas je toga svjestan.
- ✿ Laganim polukružnim pokretom ruke prema natrag navedite psa da se okrene i sjedne tačno pored vas.
- ✿ Dok pokrećete ruku, kako pokazuje slika, komandu izdajte i verbalno: "PORED".
- ✿ Kada pas sjedne pored vas, odmah ga nagradite!
- ✿ Nagrađivanje izostavite ako pas ne posluša, već pokušajte ispočetka!





UDOMITE "ANTISTRES"

Kako nam naši krzneni prijatelji pomažu da budemo sretniji?

Samo onaj ko ima ili je nekada imao psa može u potpunosti shvatiti koliko nam ovi ljubimci donose olakšanja od svakodnevnice pune stresa, ljubavi kada je nigdje drugo nema, empatije kada nas niko drugi ne razumije i sreće kada se osjećamo isprazno... A sa svojim najboljim četveronožnim prijateljem posebnu vezu i osjećaj dijele vlasnici udomljenih pasa!



Za mene je moj Toni smisao života. On me je naučio mnogo čemu. Od kada sam ga udomila sa ulice svakodnevno me je učio kakva osoba treba da budem. Učinio je da budem bolja, da opraštam, da se ne mrštim... Oslobodio me je stresa. Naučio me da volim. Svaki dan jurim kući da ga što prije vidim i da što više vremena provedemo zajedno. On je za mene ljubav, ponos, sreća. On je za moje srce melem. Sve bih učinila za njega.

Selma Hatić



Moj sin je pronašao Bebi kada joj je bilo 3 mjeseca. Nahranio ju je i vratio na lokaciju sa ostalim psima, međutim, sutradan se ponovo pojavila pred njegovim vratima. U šali često kažemo da je sama sebe udomila. Kod mene je trebala boraviti samo privremeno, ali nakon kraćeg druženja s njom, vezala sam se toliko da više nisam bila spremna na rastanak.

Iako nikada u životu nisam ni pomislila da nabavim psa, danas sam ponosna vlasnica Bebi koja je uistinu promijenila moj život. Ranije sam rijetko izlazila, a sada bar jednom dnevno idem u dužu šetnju koja godi i meni i njoj.

Zuhra Seifert



Našu porodicu upotpunjavaju dva četveronošca koji su unijeli posebnu radost i nesebičnu ljubav u naše živote. Svakodnevno nam izvuku osmijeh na lice sa svojim spontanim vragolijama. Sasvim su različitih karaktera i to dodatno naš život čini zanimljivijim, potpunijim i ljepšim. Iako su oboje udomljeni, tzv. naše "bosanske pujde", jako su poslušni i pametni psi... i nadasve zahvalni za svu našu pažnju. Ženka Mona je razigran pas, ali isto tako ima urođeni instinkt čuvara prema nama i kući. Žučo je opet dominantan i avanturističan, ali oboje nam pružaju ogromnu ljubav i život bi bez njih bio nezamisliv.

Sabrina i Lana Novak





Ove godine podijelili smo s vama više priča o psima: neki od njih nemaju vlasnika, ali imaju prijatelje, a neki su nakon života na ulici pronašli svoj trajni dom!



Simpatični i dobroćudni pas PEPI

Neki od vas prepoznat će ovog posebno dobroćudnog psa o kojem se brinu neki jako dobri ljudi. Pepi je sretan što živi u zajednici s ljudima koji mu žele pomoći, a njegova priča divan je primjer humanosti prema socijaliziranim i zdravim napuštenim psima.

Svi znamo da bi najbolje bilo da svaki pas ima odgovornog vlasnika koji ga voli i brine o njegovim potrebama. Međutim, kada to nije moguće, na svu sreću postoji mnogo ljudi spremnih da pomognu napuštenim životinjama koje su pitome i zdrave, ali i sterilisane.

Udomljeni PAS ORKA



Umiljati pas Orka spašen je sa ulice, a svoj novi trajni dom našao je u studentskoj porodici u kojoj su svi odrasli uz pse, te su se lako odlučili na plemenitu odluku da udomie Orku. Otkako im se pridružio Orka u kući je toplije i veselije i rutina se u potpunosti promijenila. Iako ove promjene uključuju i brojne nove obaveze, Nadina, Stefan i Filip ne posmatraju ih kao odricanje, već kao brigu o prijatelju za koju im Orka uzvraća lojalnošću i ljubavlju!



Tri drugara, dva brata i PAS LEO

Leo je pas koji se odlično uklopio čim je stigao u svoj dom i postao najbolji prijatelj svojoj porodici, posebno najmlađim članovima. Uz Lea, dječaci Teo i Mak su pobijedili strah koji su imali od pasa te se rado igraju s njim, ali također preuzimaju sve obaveze odgovornih vlasnika pasa. Tako se od malih nogu ova djeca uče poštovanju drugačijih bića, različitosti i odgovornosti!





9 RAZLOGA DA UDOMITE napuštenog mješanca!



Za one koji razmišljaju da nabave psa, evo još materijala za razmišljanje! Umjesto kupovine psa, da li biste razmotrili mogućnost da ga udomite?

10. Pronađite najbolji spoj uz našu pomoć, a sve početne troškove finansira Dogs Trust.

Šta dobijate kada odlučite da udomite napuštenog psa kroz Dogs Trust Program fostering udomljanja:

- Dobit ćete stručnu podršku u pronalasku psa koji je kao stvoren za vas i vašu porodicu, umjesto da psa nabavljate samo na osnovu izgleda i prvog utiska, te bez znanja o njegovim potrebama i karakteru.
- Izbjeći ćete mogućnost da pogrešno procijenite psa i da uskoro shvatite da se o njemu ne možete propisno brinuti, te ćete time izbjeći i stres koji takva situacija može prouzročiti, a što često može završiti i napuštanjem psa.
- Dobit ćete "gotov proizvod", i to *potpuno besplatno*: vaš novi ljubimac bit će procijenjen i usklađen s vašim mogućnostima, karakterom i željama, čist i okupan, očišćen i zaštićen od svih parazita, vakcinisan, sterilisan i obučen u osnovnim komandama za život vlasničkog psa.
- Dobit ćete Dogs Trust "starter poklon" sa korisnim potrepštinama za psa, te savjetodavnu podršku u prvobitnom periodu tokom prilagođavanja psa na vaš dom.
- Spasit ćete život jednom napuštenom psu.
- Pomoći ćete zajednici da humano riješi problem napuštenih pasa.
- Spriječit ćete da jedan divan pas, pun ljubavi, bude izložen lošim iskustvima i opasnostima koje život na ulici nosi, kao i da ovaj pas, zbog loših iskustava ili okrutnih uvjeta života, postane rizik za zajednicu.

Većina pasa koji žive na ulici su mješanci, a ovo su samo neke od prednosti koje imaju:

1. Prilagodljivi su različitim sredinama.
2. Inteligentni su – naučeni instinktom za preživljavanje i brinući se sami za svoje potrebe - pronalasku hrane i izbjegavanju "nevolje".
3. Željni su vaše pažnje i dodira, jer im je upravo to često uskraćeno na ulici.
4. Veoma su zahvalni na svemu i uzvraćaju vam bezuvjetnom naklonošću i odanošću.
5. Kao mješanci više pasmina, ovi psi ne nose zdravstvene rizike kao neke čistokrvne pasmine, što još znači da će biti zdraviji ali i da ćete vi imati mnogo manje troškova za veterinarsku brigu u toku njegovog života.
6. Svaki ovakav pas je jedinstven, baš kao i svako od nas! Ima unikatan karakter i izgled, pa tako i "ličnost", što nam olakšava da sebi izaberemo odgovarajuću "pseću personu" s kojom se možemo razumjeti.
7. Postoji jako veliki izbor ovakvih pasa pa time i prilika da pronademo baš onaj pravi spoj između našeg karaktera i njihovih posebnosti.
8. Otporniji su na promjene i nisu bolešljivi.
9. Suprotno čestoj predrasudi da su psi čistokrvne pasmine lakši za obučavanje, istina je da većina mješanaca koji su usvojeni zapravo jedva čekaju da vas poslušaju i budu nagrađeni.





Možda nisam
DIZAJNERSKI
ali sigurno sam
UNIKAT



Možda vas *pravi pas* za vas željno čeka negdje na ulici!





Dogs Trust prijatelji

Sretni smo da možemo reći da imamo mnogo prijatelja, posebno među vlasnicima pasa sa kojima se družimo kada god se ukaže prilika i zbog kojih smo ponosni na sve što radimo!

Naš prijatelj je i Branko Đurić Đuro, redatelj, glumac i ljubitelj životinja, koji podržava humano, sistemsko rješenje problema napuštenih pasa i vjeruje da je ključ održivosti zakonski sistem za upravljanje populacijom pasa i odgovorno vlasništvo pasa. Sterilizacija pasa važan je dio odgovornog vlasništva jer sprečava neželjene potomke ljubimaca o kojima se niko ne može brinuti, smanjuje rizik od određenih bolesti pasa u starijem dobu, a može smanjiti i neželjeno ponašanje pasa uzrokovano reproduktivnim hormonima! Ovim putem mu se za njegov probono angažman zahvaljujemo u ime cijelog našeg tima i naših četveronožnih prijatelja!



Marija i njen pas Molly su, uz Milana, bile zvijezde u našem spotu za promociju edukacije vlasnika i obuke pasa po principu pozitivne motivacije u besplatnoj Dogs Trust Školi za pse. Marija i njen psić Molly nisu ni morale glumiti jer su zapravo igrale sebe. Od kako je "završila" Školu za pse, Molly je pas koji s Marijom može ići na njena brojna poslovna i privatna putovanja, pa čak i u avion, boraviti s njom u uredu i izlaziti s njom na popodnevnu kafu.





Dogs Trust Godišnja nagrada za humanost prema životinjama

Ponukano čestim slučajevima nesebičnosti i humanosti u odnosu prema psima, Predstavništvo Fondacije Dogs Trust od 2016. godine dodjeljuje Godišnju nagradu za humanost prema životinjama. Godišnja nagrada ima za cilj da pokaže pozitivne primjere pomaganja životinjama u nevolji, posebno psima, bez finansijskog interesa, te da podigne svijest o etičkoj i ljudskoj važnosti humanog postupanja prema životinjama.

Dosadašnji dobitnici nagrade su hrabri članovi društava koji su samoinicijativno spašavali pse koji su bili životno ugroženi: Dobrovoljno vatrogasno društvo "Vratnik" (2016) i Gorska služba spašavanja "Jablanica" (2017).



Vrijednost nagrade je oko 1.000 funti u opremi koja je korisna dobitniku, a dodatno uključuje i obuku i opremu za humano ophođenje i hvatanje pasa.

Nominacije za nagradu koja će biti dodijeljena u novembru 2018. godine možete poslati do 15. oktobra 2018. godine uz obrazloženje kako se nominovana strana uklapa u kriterije, i to na e-mail: office@dogstrust.ba, uz svoj kontakt telefon, ime, i podacima o službi/društvu/udruženju/organizaciji/instituciji koju nominujete.

Detaljne upute i kriterije ko može a ko ne može biti nominovan možete pogledati na: www.dogstrust.ba.





INFORMACIJE

o programima

- Ljetna pauza Programa besplatne sterilizacije vlasničkih i masovne sterilizacije napuštenih pasa je od 1. 8. do 3. 9. 2018. godine.
- Završetak kampanje besplatne sterilizacije vlasničkih i masovne sterilizacije napuštenih pasa za 2018. godinu je 14. 12. 2018. godine.
- Dodatne radionice za djecu u sklopu Programa edukacije školske djece moguće je zakazati u toku mjeseca jula u vrtićima, bibliotekama, čitaonicama i u sklopu obrazovnih događaja za djecu.
- Aktivnosti Programa edukacije školske djece za školsku 2018/2019. godinu počinju u septembru 2018. godine.
- Ljetna pauza u Dogs Trust Školi za pse je od 7. 8. do 4. 9. 2018. godine.

KALENDAR

javnih događaja juli - decembar 2018.

- **“U susret ljetu sa vašim psom”**, otvaranje Programa fostering udomljavanja, 3. juli
- **“End of Summer”**, događaj za kraj ljeta, septembar
- **Promocija odgovornog vlasništva**, Istočno Sarajevo, oktobar
- **Druženje vlasnika i pasa** koji su pohađali obuku u Dogs Trust Školi za pse u Livnu, novembar
- **Dodjela Godišnje nagrade za humanost prema psima**, novembar

Najava događaja

“U susret ljetu s vašim ljubimcem”

Ove godine smo se u dva navrata družili sa osnovcima tokom proglašenja pobjednika takmičenja našeg Programa edukacije školske djece, i to u Zvorniku i u Banjaluci!

Sljedeće na programu je događaj za odgovorne vlasnike pasa, one koji to žele postati, djecu, roditelje i sve

ljubitelje pasa! Događaj “U susret ljetu s vašim ljubimcem” je prilika da i zvanično otvorimo naš Program fostering udomljavanja te vam predstavimo našeg fostering koordinatora, prve fostering volontere i zvijezdu događaja – psa po imenu Teo, prvog psa u ovom Programu!




Kako bi zabava bila što bolja, upriličili smo i Facebook takmičenje za najbolje “Look-a-like” fotke, tj. fotke na kojima se vidi kako ste vi i vaš ljubimac slični. Vrijedni pokloni za što ugodnije i zabavnije ljetu s vašim ljubimcem, poseban poklon za djecu te nagrade za najbolje fotke sigurno će obradovati sve vlasnike pasa!





RASPORED ČASOVA



	Ponedjeljak	Utorak	Srijeda	Četvrtak	Petak
1					
2					
3					
4					
5					
6					
7					



BITI VLASNIK PSA JE ZABAVNO ALI JE I VELIKA ODGOVORNOST





ŠKOLA ZA PSE

Predstavništvo Fondacije Dogs Trust u BiH
Gorica 61, 71000 Sarajevo, Bosna i Hercegovina
T 033 832 593 T 033 837 649 F 033 832 634
office@dogstrust.ba www.dogstrust.ba

ŠKOLA ZA PSE
UZ PODRŠKU PREDSTAVNIŠTVA FONDACIJE DOGS TRUST U BIH

Prijavni obrazac za Školu za pse

OBRAZAC 4

Ime i prezime vlasnika:

Broj telefona:

E-mail:

Odgovarajući termin:

Mjesto stanovanja:

Vrsta psa:

Starost psa:

Kastriran/sterilisan:

Spol psa:

Datum vakcinacije protiv bjesnila:

Broj mikročipa:

Da li pas ima zdravstveni problem (ako da, koji)?

Da li pas ima određene alergije?

Problemi sa psom:

Ovim se obavezujem da ću na dogovorene termine dolaziti redovno te da ću u iznimnom slučaju izostanka instruktora o tome obavijestiti 24 sata ranije.

Potpis vlasnika psa

Datum:





PROGRAM FOSTERING UDOMLJAVANJA
UZ PODRŠKU PREDSTAVNIŠTVA FONDACIJE DOGS TRUST U BIH

Prijava za udomitelje

1. STRANA

Ime:

Prezime:

Dob:

Broj telefona:

Adresa:

E-mail:

1. Zašto želite da udomite psa?

2. Koliko odraslih osoba ima u Vašem domaćinstvu?

3. Navedite njihovu dob:

4. Koliko djece stanuje u Vašem domaćinstvu?

4. Navedite dob djece:

5. Da li imate djecu koja dolaze u posjetu?

6. Navedite dob djece:

7. Opišite sebe ukratko (aktivnost, sedmični raspored, hobi, karakter itd.):

8. Vaše zanimanje:

9. Da li ste zaposleni?

10. Radno vrijeme:

11. Kratki opis posla:

12. Stanujete li u vlastitom
stanu/kući?

13. Ako ne, možete li obezbijediti saglasnost najmodavca za držanje psa?

14. Vrsta posjeda (npr. stan, kuća, farma):

15. Da li posjed posjeduje vrt?

16. Da li je u potpunosti zatvoren?

17. Da li imate prevozno sredstvo?



18. Ako NE, možete li obezbijediti transport za psa?

19. Da li imate psa/pse?

20. Ako DA, precizirajte ispod:

	Ime psa	Rasa	Spol	Starost	Vakcinisan	Kastriran/ sterilisan?
1.						
2.						
3.						

21. Da li ste ranije bili vlasnik psa?

22. Ako da, napišite nekoliko rečenica o svom iskustvu vlasnika psa:

23. Da li imate drugih ljubimaca?

24. Ako DA, precizirajte broj i vrstu:

25. Kako se Vaš ljubimac slaže sa (drugim) psima?

26. Gdje ste čuli za naš Program?

27. Opišite izgled, karakter, starost, potrebe i druge karakteristike psa kakvog biste željeli udomiti:

28. Ovdje možete navesti sve druge informacije koje smatrate relevantnim za udomljavanje psa:

Datum:

Potpis

